

Colegio Laura Wernet Paskel a tene un mainta "In Memoriam Simeon "Meneer Sim" Frank"



ORANJESTAD (AAN): Di-aluna mainta e team di Colegio Laura Wernet-Paskel (CLWP) hunto cu e alumnonan a tene un ceremonia na memoria di señor di Simeon Frank, mihor conoci como "Meneer Sim".

Ex-cabesante, meneer Rufo Kelly y ex-cabesante interino, juffrouw Jeanette Croës-Fingal a traha hopi año cu meneer Sim. Cabesante y coleganan di CLWP ta yama un danki na meneer Rufo y juffrouw Jeanette pa a acepta e invitacion pa a bin conta e alumnonan ken meneer Sim tabata. Despues di a traha na diferente school na Aruba

Meneer Frank a worde nombra como e prome cabesante di e school basico nobo den e bario di Kadushi Largo, St. Janschool. E school tabata un school catolico mixto.

E school no a cuminsa di biaha cu e año escolar 1962/1963. E motibo tabata cu tur banki a yega desarma. Meneer Frank hunto cu otro colega mester a arma tur e bankinan.

E school tabata consisti di dos hala: un banda pasuid y e otro banda panort.

Meneer Frank tabata un cabesante hoben contando 29 año di edad y tabata un persona hopi dedica den su funcion

di cabesante. Hunto cu su señora juffrouw Crispina, mihor conoci como juffrouw Cris, nan dos tabata sali di Malmok pa bin duna les na Sint Janschool. Tur colega tabata sa kico nan tabatin na Meneer Frank como cabesante. Bo por a yega cerca dje cu bo problemanan y e tabata comprende. Dia cu el a anuncia cu e lo bay bira director di otro school henter e sala a keda keto. Tur colega a lamenta esaki pasobra nan no kier a perde un bon cabesante. Un persona comprensivo, dedica y cu hopi talento.

Meneer Frank a traha di año 1962 te na final di año escolar 1982/1983 na St. Janschool. El a diseña e logo di St. Janschool. E logo aki a pasa pa St. Jan Kleuterschool, ora St. Janschool a haya su number nobo di CLWP. Despues dia 15 di augustus 1983 el a bira director di ETAO Maria College.

Den number di Colegio Laura Wernet-Paskel nos ta agradecido pa tur loka Meneer Sim Frank a haci pa nos school. Un gran baluarte a bay laga nos.

Meneer Sim sosega den brasa di Senjor!